

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj: 01-02-5780/25
Sarajevo, 03.04.2025. godine

OPĆINA NOVI GRAD SARAJEVO

OPĆINSKI NAČELNIK

PREDMET: Vijećnička pitanja i inicijative, dostavlja se

Na 5. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

- a) Vijećničke inicijative

-Klub vijećnika SDA-

Inicijativa za izuzeće Općine Novi Grad Sarajevo od neradne nedjelje i praznicima

U "Službenim novinama FBiH" broj 102/24, objavljena je Uredba o kriterijima za primjenu odredbi člana 18. stav 10) i 11) Zakona o unutrašnjoj trgovini.

Stavovima 10) i 11) člana 18. Zakona, određeno je da Vlada FBiH može donijeti odluku kojom se određuje da prodajni objekti na teritoriji određenog grada/općine budu otvoreni nedjeljom ili za dane praznika.

Uredbom je propisana procedura po kojoj gradsko/općinsko vijeće može dati prijedlog Ministarstvu trgovine/Vladi FBiH da prodajni objekti budu otvoreni nedjeljom i za dane praznika. Prijedlog mora sadržavati objektivne razloge i detaljno obrazloženje, a naročito podatke o:

- uticaju na pad prometa u djelatnosti trgovine na nivou lokalne zajednice, u odnosu na isti period 2023. godine,
- uticaju na pad broja zaposlenika u djelatnosti trgovine na nivou lokalne zajednice, u odnosu na isti period 2023. godine,
- opravdanosti za prijedloge sezonskog karaktera i period izuzeća u slučaju zahtjeva za sezonsko izuzeće.

S tim u vezi, predlažemo da Općinsko vijeće Novi Grad Sarajevo donese zaključak kojim će zadužiti Općinskog načelnika i Službu za privredu da u saradnji sa nadležnim općinskim službama odmah pristupe prikupljanju svih potrebnih podataka za podnošenje prijedloga Vladi Federacije Bosne i Hercegovine, putem Federalnog ministarstva trgovine s ciljem izuzimanja prodajnih objekata, ali i drugih objekata na području Općine Novi Grad Sarajevo, od zabrane rada nedjeljom i na dane praznika.

-vijećnik Adi Škaljić -

Upućujem inicijativu za utvrđivanje postojanja interesa Općine Novi Grad Sarajevo za projekat izgradnje osnovne muzičke škole na području naše općine.

O B R A Z L O Ž E N J E

Uvođenje osnovne muzičke škole u Općini Novi Grad Sarajevo predstavlja važnu inicijativu koja bi značajno doprinijela kulturnom i obrazovnom razvoju ove zajednice.

Općina Novi Grad je najmnogoljudnija općina u Kantonu Sarajevo, a trenutni nedostatak osnovne muzičke škole stvara prazninu koja je vidljiva među roditeljima i djecom. Prema istraživanju koje smo proveli, 43% roditelja razmatralo je mogućnost upisa djece u osnovnu muzičku školu, ali su mnogi odustali zbog nedostatka ove opcije u našoj općini.

Uvođenjem takve škole, djeca bi dobila priliku za razvoj muzičkog talenta, što doprinosi njihovom sveukupnom obrazovanju i kreativnom izražavanju. Također, osnivanje muzičke škole može doprinijeti jačanju kulturnog identiteta i pružiti djeci i mladima priliku za profesionalnu edukaciju u oblasti muzike.

Pored toga, osnovna muzička škola bi bila značajan doprinos socijalnom razvoju, jer bi omogućila djeci iz različitih socio-ekonomskih sredina da se upuste u muzičko obrazovanje. Na kraju, uvođenjem muzičke škole povećala bi se ponuda kulturnih aktivnosti, čime bi se unaprijedila kvaliteta života u Općini Novi Grad.

Više o rezultatima istraživanja koje je provedeno na uzorku od 186 roditelja u dokumentu koji je u prilogu.

-vijećnik Jasmin Šošić -

1. Upućujem vijećničku inicijativu prema nadležnoj općinskoj službi.

Usljed obilnih padavina dolazi do čestog izlivanja potoka koji prolazi kroz naselje Rječica, posebno u dijelu Istočnobosanske ulice kod broja 80. Ova situacija predstavlja ozbiljan problem za stanovnike, ugrožava saobraćaj i onemogućava normalno kretanje pješaka. Poseban problem je što djeca iz ovog dijela naselja nisu u mogućnosti otići u školu zbog plavljenja puta.

Jedno od mogućih rješenja je produbljenje korita potoka kako bi se povećao njegov kapacitet i spriječilo izlivanje vode na cestu. Također, kroz ovaj potok prolazi cijev lokalnog vodovoda koji snabdijeva stanovništvo vodom, što dodatno ukazuje na potrebu za hitnom intervencijom kako bi se spriječile eventualne štete na infrastrukturi i osiguralo nesmetano vodosnabdijevanje.

S obzirom na ozbiljnost problema i njegov utjecaj na svakodnevni život stanovnika, upućujem ovu inicijativu nadležnoj općinskoj službi s ciljem poduzimanja hitnih mjera za sanaciju i trajno rješavanje problema regulacije korita potoka.

2. Inicijativa za ucjevljenje potoka u ulici Podrinjska (od broja 1 do 23)

Poštovani,

Obraćam se nadležnoj općinskoj službi u vezi s problemom otvorenog potoka koji se proteže duž ulice Podrinjska, od broja 1 do 23. Na terenu je evidentno da potok stvara brojne poteškoće za stanovnike ove ulice, uključujući:

Opasnost za pješake i vozila zbog otvorenog i neuređenog korita.

Nakupljanje otpada i neugodnih mirisa, što negativno utječe na higijenske uslove.

Mogućnost plavljenja prilikom obilnijih padavina, čime se ugrožavaju prilazi domaćinstvima i imovina građana.

S obzirom na navedene probleme, predlažem da nadležna služba razmotri mogućnost ucjevljenja ovog potoka, čime bi se značajno poboljšala sigurnost i komunalna infrastruktura u ovom dijelu općine Novi Grad.

Molim Vas da mi dostavite odgovor o mogućnostima realizacije ove inicijative, kao i informacije o eventualnim planiranim koracima u vezi s ovim pitanjem.

Unaprijed zahvaljujem na Vašem angažmanu i očekujem Vaš odgovor u što kraćem roku.

3. Inicijativa i pitanje nadležnim službama u vezi s problemom izljevanja kanalizacije u ulici Sulje Jahića između brojeva 134 i 92

Građani iz ulice Sulje Jahića su me kontaktirali s inicijativom za hitno rješavanje problema izljevanja kanalizacije na dijelu između brojeva 134 i 92. Ovaj problem se ponavlja svaki put kada dođe do jačih padavina, usljed čega dolazi do izljeva fekalne kanalizacije, koja se zajedno s kišnicom slijeva pred ulaz u Sulje Jahića 92. Ovakva situacija ozbiljno ugrožava higijenske i zdravstvene uslove stanovanja, kao i sigurnost građana.

S obzirom na to da se problem već duže vrijeme ne rješava, molimo nadležne općinske i komunalne službe da hitno poduzmu potrebne mjere kako bi se spriječilo dalje izljevanje kanalizacije i osigurali normalni uvjeti za život građana.

Molim da me obavijestite o planiranim koracima i rokovima za rješavanje ovog problema. Građani ovog dijela naselja očekuju brzu reakciju nadležnih službi kako bi se spriječile daljnje štete i neprijatnosti.

-vijećnik Bojan Vučković -

1. Rekonstrukcija parka u ulici Milana Preloga, između brojeva 15 i 17

Obrazloženje:

Park se nalazi u jako zapuštenom stanju. Betonirana površina je na većem dijelu „pojeden“ od strane trave. Na mjestu ovog nekadašnjeg parka se nalazi i dalje zastarjela ljuljaška za djecu te klupe koje sada služe za skupljanje osoba sumnjivih navika i radnji. Kako se sa druge strane zgrade u ulici Milana Preloga između brojeva 11 i 15 nalazi novo i nedavno obnovljeno igralište, mišljenja sam da na ovom, inicijativom obuhvaćanom igralištu, nema potrebe za novim mobilijarom te da rekonstrukcija treba da obuhvati samo već navedenu betonsku površinu sa popravkom dotrajalih klupa, te spajanje parka kako sa jedne strane sa jednosmjernom cestom u ulici Milana Preloga do broja 15 (jer sada svi koji sa ove strane idu u park moraju da prelaze preko blatnjave površine), te sa druge strane spajanje sa parkingom koji se nalazi iza BP Selex.

2. Podnosim inicijativu za Izgradnja spomen obilježja braći Kadić, poginulim borcima Armije RBiH, a uz to i uspješnim sportistima bivše Jugoslavije.

Obrazloženje:

Ratne 1992. godine, 22. aprila, odnosno 2. juna istaknuti bosanskohercegovački sportisti, bokseri, braća Kadić, Fikret i Safet dali su živote u odbrani grada Sarajeva i države Bosne i Hercegovine. Fikret je bio član i kapiten Bokserskog kluba Željezničar, republički prvak i reprezentativac bivše Jugoslavije. Kao i stariji brat Fikret, i Safet je sebe pronašao u sportu. Izuzetno talentovan, prvo je išao bratovim stopama u ringu, da bi se nakon toga opredijelio za najvažniju sporednu stvar. Braća Kadić su bili istaknuti borci grada i Armije RBiH, članovi Zelenih beretki i organizatori otpora u općini Novi Grad Sarajevo.

Na mjestu pogibije kod nekadašnje „Božić pumpe“ u novogradskom naselju Briješće, a danas Gazprom pumpe se svake godine, polaganjem cvijeća i učenjem Fatihe odaje počast ovim velikanima naše odbrane. Ali ono što nije ni malo pohvalno i što nam svima ne ide na čast je da se ni skoro 30 godina nakon završetka rata nije napravilo spomen obilježje braći Kadić te da se vijenci i cvijeće polažu na travu.

Stoga upućujem inicijativu da se na mjestu pogibije, najbolje do dana pogibije 22.04., izgradi dostojanstveno spomen obilježje braći Kadić, velikanima odbrane naše domovine.

3. Postavljanja radara u ulici Safeta Hadžića između trolejbuske stanice i Bosmal City Centra

Obrazloženje:

Na ovom dijelu ulice Safeta Hadžića, od kružnog toka kod pekare „AS“ pa sve do Bosmal City Centra smo svjedoci svakodnevnim trkama i turiranjima motociklista i nesavjesnih vozača automobila, posebno u večernjim satima. Od buke koju stvaraju te da ne govorimo o opasnosti u koju dovode sve

druge učesnike u saobraćaju a posebno pješake te korisnike javnog prevoza, stanovnici ovog dijela Opštine Novi Grad Sarajevo ne mogu da normalno spavaju niti da se osjećaju sigurno.

Stoga kako bi konačno ovoj situaciji stali u kraj smatram da bi postavljanje „ležećih policajaca“ a još bolje radara za mjerenje brzine negdje na nivou gdje ulica Albanska ulazi u ulicu Safeta Hadžića riješilo ovaj sigurnosni problem.

-vijećnica Selma Alić -

1. Podnosim inicijativu za sanaciju dijela ulica Vrbovska od broja 3 do broja 11 i Muftije Džabića od broja 1 do broja 8 na području MZ Anex.

Obrazloženje

Dio naselja Anex nema adekvatno uređenu cestu, trotoar, parking mjesta i prilaz stambenim objektima. Dio trotoara koji postoji na jednoj strani ulice zauzimaju nepropisno parkirana vozila. Potrebno je obnova asfalta navedenog dijela naselja, uređenje u smislu sigurnog kretanja pješaka i označavanje parking mjesta gdje je to moguće izvesti. Također predlažem postavljanje klupa sa naslonom i korpi za odlaganje otpada kako bi građani imali bolje uslove.

2. Podnosim inicijativu da sportska dvorana koja se nalazi uz Osnovnu školu „Umihana Čuvidina“ naselje Boljakov Potok dobije ime po poginulim borcima Armije RBiH, a uz to i uspješnim sportistima bivše Jugoslavije braći Kadić.

Ukoliko nije izvodljivo navedeno predlažem da novoizgrađena IX transferzala dobije ime po poginulim borcima braći Kadić.

Obrazloženje

Za one generacije koje neznaju, braća Kadić Fikret i Safet koji su bili stanovnici naselja Boljakov Potok nesebično su se odmah na početku rata priključili jedinicama odbrane grada Sarajeva. Na žalost, te ratne 1992.godine dali su svoje živote u odbrani grada Sarajeva kod nekadašnje „Božića pumpe“ u novogradskom naselju Brijesće gdje ni do dan danas nije postavljeno spomen obilježje tim mladim borcima uspješnim sportistima, Fikret Kadić bio je član i kapiten boksetskog kluba Željezničar, republički prvak i reprezentativac bivše Jugoslavije. Kao i stariji brat i Safet se pronašao u sportu.

Bili su vrhunski sportisti koji su postizali sjajne rezultate.

Delegacija Općine svake godine položi cvijeće na mjestu stradanja, ali mnogi građani su mišljenja da takvi borci nezaslužuju polaganje cvijeća na travnjaku na ulici.

Novoizgrađena sportska dvorana nalazi se uz Osnovnu školu, a još uvijek nema ime.

Davanjem imena sportskoj dvorani ili novoizgrađenoj transferzali po poginulim borcima braći Kadić svi mi ćemo odati počast kakvu zaslužuju i zahvalnost ovim mladim borcima koji su nesebično položili živote kao i mnogi drugi heroji grada Sarajeva kako bismo mi danas postojali i kako bi buduće generacije učile kroz historiju o našim herojima i sjajnim sportistima.

-vijećnik Damir Filipović -

1. Inicijativa za prenamjenu objekta MZ „Alipašin Most III, Razvojna Agencija Novi Grad“ u multifunkcionalni prostor sa dva odvojena ulaza, od kojih bi jedan bio namijenjen osnovnoj školi

Obrazloženje:

S obzirom na to da objekat MZ „Alipašin Most III, Razvojna Agencija Novi Grad“ još uvijek nije izgrađen, ali postoji idejni projekat i riješeni imovinsko-pravni odnosi, predlažemo njegovu prenamjenu kako bi se omogućila multifunkcionalna namjena prostora. Konkretno, objekat bi imao dva odvojena ulaza – jedan za potrebe osnovne škole, a drugi za rad mjesne zajednice i razvojne agencije.

Ova inicijativa je posebno značajna jer prema važećoj planskoj dokumentaciji školski objekat treba biti izgrađen na drugoj lokaciji, koja se nalazi u privatnom vlasništvu. Međutim, rješavanje

imovinsko-pravnih odnosa za tu parcelu zahtijevalo bi velika finansijska sredstva za naknadu eksproprijacije, što može značajno odgoditi realizaciju projekta osnovne škole.

Ovim prijedlogom bi se na racionalan i ekonomičan način riješilo pitanje školskog prostora, bez potrebe za dugotrajnim procesima eksproprijacije i značajnim finansijskim izdvajanjima iz budžeta. Pozivamo nadležne općinske organe da podrže ovu inicijativu i poduzmu potrebne korake kako bi se omogućila njena realizacija u najboljem interesu građana i lokalne zajednice.

2. Inicijativa za hortikulturno uređenje zelenih površina u MZ Dobrinja 3, u ulici Dobrinjske bolnice. Obrazloženje:

Upućujem inicijativu u ime stanovnika Mjesne zajednice Dobrinja 3 u ulici Dobrinjske bolnice koji imaju želju da očuvaju i unaprijede zelene površine u svom naselju a na kojoj je prethodno pokušano pretvoriti u parkinge, na što su građani izrazili nezadovoljstvo.

S obzirom na to, predlažemo inicijativu za hortikulturno uređenje postojećih zelenih površina, uključujući izgradnju pješačkih staza i postavljanje neophodnog mobilijara poput klupa, kanti za otpatke i sl. Ovo bi doprinijelo stvaranju ugodnijeg i sigurnijeg okruženja za sve stanovnike, posebno za djecu.

Očuvanje i unapređenje zelenih površina ne samo da poboljšava estetski izgled naselja, već i doprinosi boljem kvalitetu zraka, smanjenju buke te pruža prostor za rekreaciju i druženje. Stoga, pozivamo nadležne općinske vlasti da podrže ovu inicijativu i zajedno s građanima rade na njoj realizaciji.

3. Na Lokaciji Aneks, ul Vrbovska prema JU OŠ „Aneks“ Sarajevo neophodno je da se postavi zaštitna ograda uz saobraćajnicu, zaštiti prilaz trafostanici koja je uz samu školu, kao da se navedeni prostor očisti od otpada i niskog rastinja.

Obrazloženje:

Stanovnici naselja Aneks ukazuju na probleme sigurnosti i uređenja prostora uz saobraćajnicu u ulici Vrbovska. Na ovom lokalitetu ne postoji adekvatna zaštitna ograda uz prometnicu, što predstavlja potencijalnu opasnost za učenike i pješake koji svakodnevno koriste ovu dionicu.

Pored toga, prilaz trafostanici, koja se nalazi u neposrednoj blizini škole, nije adekvatno zaštićen, što može predstavljati rizik za djecu i druge prolaznike te je potrebno poduzeti neophodne mjere zaštite kako bi se spriječile eventualne nezgode.

Dodatni problem predstavlja neuređenost i zapuštenost ovog prostora, koji je prekriven otpadom i niskim rastinjem. Takvo stanje narušava izgled naselja i može doprinijeti stvaranju nehygieničkih uslova te povećanju rizika od nesigurnosti.

Realizacija ove inicijative značajno bi doprinijela povećanju sigurnosti djece i svih stanovnika naselja Aneks, unapređenju komunalne uređenosti te boljoj zaštiti javne infrastrukture. Pozivamo nadležne općinske organe da u što kraćem roku poduzmu potrebne korake kako bi se riješili navedeni problemi i osiguralo sigurno i uredno okruženje za sve građane.

4. Sanacija krova na zgrade u ul. Gandijeva od br. 1-4.

Obrazloženje:

Stanari zgrada u ulici Gandijeva br. 1-4 već duži vremenski period suočavaju se s problemom dotrajalog i oštećenog krova, što uzrokuje brojne tehničke i sigurnosne poteškoće. Oštećenja na krovu rezultiraju prokišnjavanjem, što dovodi do pojave vlage i oštećenja unutar stanova na višim spratovima, ali i do narušavanja statičke stabilnosti samog objekta

Pored estetskih i funkcionalnih problema, ovakvo stanje može uzrokovati i dodatne materijalne štete, posebno u zimskom periodu kada dolazi do zadržavanja snijega i leda na oštećenim dijelovima krova. Dugoročno, neadekvatno održavanje može dovesti do još većih finansijskih troškova sanacije, kao i potencijalnih rizika za stanare i prolaznike.

Sanacija krova na ovim objektima doprinijela bi poboljšanju kvaliteta života stanara, očuvanju vrijednosti nekretnina te smanjenju budućih troškova održavanja. Pozivamo nadležne općinske organe da podrže ovu inicijativu i omoguće njenu realizaciju u što skorijem periodu.

5. Na osnovu člana 97. stav (1) Poslovnika o radu Općinskog vijeća Novi Grad Sarajevo upućujem sljedeća pitanja:

1.Koja je planska namjena i šta je planirano za izgradnju na lokaciji Novi Grad, K.O. Novo Sarajevo III, parcele broj 34/1, 34/2, 34/3, prema važećoj planskoj dokumentaciji?

2.Da li postoji plan ili projekat za izgradnju kanalizacione mreže i kolektora u naselju Rječica, te kada se može očekivati njegova realizacija?

3.Stanari zgrade u ulici Baranislava Nušića 158A, B i C su se obraćali dopisom prema Općini Novi Grad da se obezbijedi sigurnost pješaka obzirom da nepropisno parkirana vozila uzurpiraju trotoare, da li se nešto namjerava poduzeti u skorije vrijeme?

4.Molim da nadležna služba dostavi spisak svih poslovnih prostora kojima raspolaže Općina Novi Grad Sarajevo te da se u tabelanom prikazu navedu svi bitni elementi (adresa, kvadratura, slobodan/zauzet, korisnik, iznos zakupnine)?

5.Molim da mi dostavite informaciju u kojem iznosu je Općina Novi Grad Sarajevo učestvovala u sljedećim projektima saobraćajne infrastrukture u periodu 2019. – 2024. godine:

a)Ul. Džemala Bijedića od spoja sa VI do spoja sa IX transferzalom

b)Ul. Džemala Bijedića

c)Ul. Kurta Schorka krak

d)Regionalni put R-951 – ul Ahatovića

e)A transferzala

f)Adema Buće

g)Ul. Reljevska

h)VII transferzala

i)Avde Palića

j)Safeta Hadžića

k)Avde Palića

l)A transferzala –Raskrsnica na spoju sa ul. Braće Mulić i raskrsnica na spoju sa ulicom Branislava Nušića

m)Kružni tok na spoju ulice Džemala Bijedića i Srđana Aleksića

n)Bulevar Mimara Sinana

o)Ul. Majdanska

p)Ul Olimpijska

-vijećnik Elma Lindov -

1.Inicijativa o stipendiranju učenika i studenata

Na jednoj od prethodnih sjednica Općinskog vijeća sam tražila da mi se dostavi Pravilnik o stipendiranju učenika i studenata, i odgovor od nadležne službe nikada nisam dobila. Zbog nedostatka informacija, nisam imala priliku da se upoznam sa pojedinostima traženog dokumenta.

Međutim, dobila sam informaciju da u slučaju kada porodica ima više djece, koji ispunjavaju uslove za stipendiranje, pravo na stipendiju ostvaruje samo jedno dijete.

Smatram da je ovo vrlo nepravedno i diskriminirajuće prema porodicama koje imaju više uspješne djece, jer se ovim postupcima uskraćuju jednaka prava i podrška djeci koja svojim trudom i zalaganjem ispunjavaju kriterij stipendiranja.

Stoga, podnosim vijećničku inicijativu kojom tražim:

1.Da mi se dostavi Pravilnik o stipendiranju učenika i studenata u što kraćem roku;

2.Da se što prije razmotre izmjene navedenog pravilnika, kako bi sva djeca iz jedne porodice, ukoliko ispunjavaju uslove, imala jednaka prava na stipendiju.

Očekujem da ćete ovu inicijativu što prije uzeti u razmatranje, te u idućoj raspodjeli sredstava za stipendije uvrstite gore predložene izmjene.

Tražim odgovor u što kraćem roku. Ukoliko ne dobijem odgovor do sljedeće sjednice Općinskog vijeća, zatražit ću da Općinsko vijeće donese zaključak kojim će zahtijevati izmjene navedenog Pravilnika, te da se isti nakon izvršenih izmjena dostavi Općinskom vijeću na uvid.

2. Postavljanje usporivača (ležećih policajaca) ili radarskog nadzora

Ovim putem podnosim vijećničku inicijativu za postavljanje usporivača (ležećih policajaca) ili postavljanje radarskog nadzora na području Alipašinog Polja u B fazi u ulicama:

- Semira Frašte između brojeva 6 i 7;
- Nerkeza Smailagića između brojeva 6 i 7;
- Nerkeza Smailagića između brojeva 12 i 13.

Na ovom području je velika frekvencija saobraćaja, a vidljivost vozača i pješaka je značajno smanjena zbog parkiranih vozila koja se nalaze uz samu saobraćajnicu, te shodno navedenom, predstavlja veliki rizik za sigurnost svih učesnika u saobraćaju, posebno pješaka, uključujući djecu i starije osobe.

Uzimajući u obzir sve navedene okolnosti i u cilju povećanja bezbjednosti saobraćaja, molim nadležne organe da hitno razmotre i realizuju ovu inicijativu.

3. Inicijativa za formiranje sabirnih reciklažnih punktova i aparata na području Općine Novi Grad Sarajevo

Ovim putem želim pokrenuti vijećničku inicijativu za formiranje sabirnih reciklažnih punktova i aparata na području naše Općine, s ciljem podizanja ekoloških standarda i povećanja svijesti među građanima o važnosti očuvanja okoliša, te implementiranja praksi koje doprinose zdravlju naše zajednice i očuvanju prirodnih resursa.

Naša Općina, kao i mnoge druge, suočava se sa ozbiljnim izazovima u oblasti upravljanja otpadom, posebno kada je riječ o plastici, koja predstavlja najveću prijetnju za naš okoliš zbog svoje nerazgradivosti. Upravo iz tog razloga, smatram da je nužno poduzeti konkretne korake kako bi se našim građanima omogućilo jednostavnije, efikasnije i ekološki prihvatljivo odlaganje otpada, a posebno plastike, koja u velikim količinama zagađuje našu prirodu.

Predlažem da se na teritoriji Općine Novi Grad Sarajevo postave sabirni reciklažni punktovi na racionalno odabranim lokacijama. Ovi punktovi trebaju biti smješteni na pristupačnim mjestima unutar svakog naselja, tako da nijedna lokalna zajednica ne bude udaljena od ovih ekološki prihvatljivih zona za odlaganje reciklirajućeg otpada. Sabirni punktovi trebaju biti jasno označeni, te redovno održavani kako bi građani imali motivaciju za pravilno odlaganje otpada.

Drugi dio inicijative odnosi se na uvođenje reciklažnih aparata, sličnih onima koji se koriste u mnogim zapadnim zemljama, a koji omogućavaju građanima da odlažu plastične boce i druge plastične proizvode na automatiziran način. Ovi aparati trebali bi biti smješteni na prometnim lokacijama, poput tržnih centara, javnih površina, te u blizini škola i drugih mjesta s velikim brojem posjetitelja. Ovi aparati bi, uz ekološku funkciju, mogli ponuditi i simboličnu nagradu za građane koji odlažu reciklirajući otpad, na primjer, u obliku novčane naknade (nekoliko feninga ili marku za svaku recikliranu plastičnu bocu), što bi dodatno motiviralo na ekološko ponašanje.

Također, važno je da se, uz samu implementaciju ovih reciklažnih sistema, usmjereno i motivirano djeluje prema društvu. Jedan od prijedloga koji se može ugraditi u naš sistem jeste model motivacije kroz nagrađivanje građana. Kao primjer, možemo uzeti praksu koja se koristi u mnogim zapadnim zemljama, gdje građani za svaku recikliranu plastičnu bočicu ili predmet dobiju simboličnu novčanu naknadu putem automatskih aparata. Takvi koraci mogu biti mali, ali će dugoročno doprinosti izgradnji ekološki odgovorne zajednice.

Svjesna sam da Bosna i Hercegovina trenutno ima izazove u implementaciji efikasnog sistema reciklaže, ali smatram da sa odgovarajućim angažmanom i saradnjom sa nadležnim institucijama možemo poduzeti prve korake prema stvaranju čistije, zdravije i zelenije Općine Novi Grad Sarajevo. Ova inicijativa nije samo ekološka, već je i društvena, jer daje šansu građanima da postanu aktivni sudionici u očuvanju naše okoline.

-vijećnica Hana Keč-

1. Upućujem inicijativu za premještanje pozajmnog bibliotečkog odjeljenja Alipašin most u sklopu JU Biblioteka Sarajeva.

O B R A Z L O Ž E N J E

Biblioteka Sarajeva je javna kulturna ustanova čiji je osnivač Kanton Sarajevo. Uz manje statusne promjene uspješno je prošla svoj razvojni put do današnje, moderno organizirane biblioteke. Kao institucija od posebne društvene važnosti ima značajnu ulogu u unapređenju obrazovnog nivoa stanovništva i očuvanju kulturne baštine. Dio je obimnog bibliotečkog sistema Bosne i Hercegovine i doprinosi stalnom razvoju bibliotekarstva. U cilju zadovoljenja potreba čitalačke populacije na cijelom prostoru Kantona Sarajevo, kao i dostizanja bibliotečkih normativa i standarda, Biblioteka kontinuirano razvija mrežu pozajmnih odjeljenja. Do sada je oformljeno 17 pozajmnih odjeljenja. Na području Općine Novi Grad egzistira pet pozajmnih odjeljenja. U okviru mreže pozajmnih odjeljenja JU Biblioteka Sarajeva egzistira pozajmno odjeljenje Alipašin most u ulici Kasima Hadžića do br.6. Isto je smješteno u zgradi u kojoj se nalazi Područna ambulanta Alipašin most II Mjesna zajednica. Navedeno pozajmno odjeljenje se nalazi na nepristupačnom mjestu te nije dostupno većem broju stanovnika Općine Novi Grad. Korisnici bibliotečkih usluga (djeca predškolskog uzrasta, učenici osnovnih i srednjih škola, penzioneri i svi ostali korisnici) moraju proći kroz čekaonicu navedene ambulante što je potpuno neprihvatljivo za njihovo zdravlje. Smatramo da bi navedno pozajmno odjeljenje u potpunosti zadovoljilo potrebe čitalačke populacije sa područja Općine Novi Grad i djelovalo u okviru bibliotečkih normativa i standarda premještanjem u drugi adekvatniji prostor koji će zadovoljiti potrebe korisnika bibliotečkih usluga i biti prostor sa mogućnošću realizacije dječijih kreativno/edukativnih radionica, promocija knjiga, druženja sa autorima.

2. Upućujem inicijativu da se na području Opštine Novi Grad Sarajevo postavi reciklomat za hranjenje pasa i mačaka.

OBRAZLOŽENJE:

Reciklomat koji radi na principu da građani ubacuju reciklabilne materijale poput plastičnih boca u zamjenu za hranu ili vodu za životinje. Svakim novim korištenjem, u posudu izlazi 30 do 40 grama hrane. Na ovaj način osiguravamo hranu ili vodu za životinje koje su u potrebi, a istovremeno motivišemo građane da recikliraju.

Po uzoru na svjetske metropole kao npr. Istanbulu ima veliki broj ovakvih reciklomata, ova humana inicijativa će doprinjeti smanjenju problema koji izazivaju pasi lutalice, a s druge strane, hranjenjem napuštenih životinja poboljšavamo sigurnost naših građana

S druge strane, razvijamo ekološku svijest kod naših sugrađana jer sve one plastične boce koje su završavale u nekom kombinovanom i mješovitom otpadu, na ovaj način idu na posebne deponije i biće reciklirane.

Ovo je odličan primjer kombinacije brige o životinjama i podizanja ekološke svijesti u korist zajednice.

-vijećnica Aida Ožegović -

Inicijativa: Uposlenici općine nisu obavili sistematski pregled duže od 5 godina, a po zakonu je da se sistematski radi svake 2 godine, molim da se obezbijede sredstva u iznosu od cca 30.000 KM kako bi obavili sistematski u 2025.

-vijećnica Emina Hasanović -

1. UREĐENJE JAVNOG PROSTORA U ULICI HASANA SUĆESKE 1-3

Obraćam se inicijativom za uređenje prostora u unutrašnjem dvorištu zgrade u ulici Hasana Sućeske 1-3.

Ovaj prostor je nesiguran i poznat po okupljanju sumnjivih lica i korisnika narkotičkih sredstava. Prostor je trenutno mračan, prljav i zapušten, što izaziva zabrinutost i strah građana.

Pozivam nadležne da poduzmu mjere za postavljanje javne rasvjete na ovom prostoru, kako bi se stvorio siguran ambijent.

Nakon što se riješi pitanje rasvjete, pozivam nadležne da, u skladu s potrebama građana, ovaj prostor urede kao igralište/šetalište/parking, ovisno o potrebama zajednice.

Ova inicijativa dolazi iz MZ Saraj Polje, nalazi se na listi prioriteta i smještena je na prvom mjestu u rubrici "Izgradnja i sanacija dječijih igrališta."

Zahvaljujem na razmatranju ove inicijative i radujem se vašim povratnim informacijama.

2. UPIS KONTAKT INFORMACIJA VIJEĆNIKA NA WEB STRANICI OPĆINE NOVI GRAD

Pokrećem inicijativu dodavanja kontakt informacija vijećnika na službenoj stanici Općine Novi Gra. U cilju poboljšanja komunikacije između građana i vijećnika, predlažem da se na službenoj web stranici Općine Novi Grad, u rubrici "Općinsko vijeće", uz fotografije vijećnika, upišu njihove e-mail adrese ili drugi relevantni načini za kontakt. Time bi građani imali lakši pristup vijećnicima i mogućnost direktnog komuniciranja u vezi s pitanjima ili problemima koji se tiču njihove lokalne zajednice.

3. OZNAČAVANJE KRAKOVA ULICE RAMIZA SALČINA

Predlažem da se na početku svakog kraka ulice Ramiza Salčina postavi oznaka koja će jasno naznačiti od kojeg do kojeg broja ide određeni krak ulice. Ova ulica obuhvata široko područje MZ Saraj Polje i ima desetak krakova. Budući da je ova ulica posvećena našem heroju, važno je osigurati da svi dijelovi budu jasno označeni kako bi se pojačala i njegova simbolika, ali i unaprijedila funkcionalnost ulice za sve građane.

4. OBNOVA AMFITEATRA U AERODROMSKOM NASELJU

Pokrećem inicijativu za obnovu amfiteatra u aerodromskom naselju, kako bi se ponovo vratio u život i postao aktivno kulturno središte. Amfiteatar u Aerodromskom naselju ima historijsku i emocionalnu vrijednost za građane Aerodromskog naselja. Prostor je nekada bio simbol zajedništva i kulturnog identiteta zajednice.

Nažalost, danas je ovaj amfiteatar zapušten i neiskorišten, iako predstavlja ogroman potencijal za obnovu kulturnih aktivnosti u ovom naselju.

Pored toga, predlažemo da se Amfiteatar uvrsti u program Novogradskih dana, što bi omogućilo njegovu upotrebu za različite kulturne i umjetničke događaje. Tražim da se razmotri i uključivanje ovog prostora u program Sarajevo Film Festivala (SFF), čime bi dobio i međunarodnu vidljivost i doprinio kulturnom životu grada.

Ova inicijativa ne bi samo revitalizirala fizički prostor, već bi ponovno povezala zajednicu, čime bi amfiteatar postao simbol kulturnog razvoja i oživljavanja tradicije Aerodromskog naselja. Pozivamo nadležne institucije, kulturne organizacije i sve građane da podrže ovaj projekt i daju doprinos u vraćanju života ovom značajnom prostoru.

5. DOPUNA INICIJATIVE: RJEŠAVANJE PROBLEMA NEADEKVATNOG DIMNJAKA UGOSTITELJSKOG OBJEKTA U STAMBENOJ ZONI

Primila sam vaš odgovor vezan za inicijativu sa treće radne sjednice, u vezi rješavanja problema neadekvatnog dimnjaka ugostiteljskog objekta (čevabdžinice) u ulici Branilaca Dobrinje. Obavijestili ste me da je potrebno precizirati adresu ili naziv ugostiteljskog objekta. Radi se o čevabdžinici "Mrkva", koja se nalazi u pomenutoj ulici. Nadam se da će ova precizna informacija omogućiti dalje razmatranje i adekvatnu reakciju u vezi dimnjaka ovog ugostiteljskog objekta.

u prilogu kopija pomenute inicijative:

Obraćam se u ime stanara, u vezi neadekvatno izvedenog dimnjaka ugostiteljskog objekta (čevabdžinica) koji se nalazi među stambenim objektima u ulici Bulevar branilaca Dobrinje. Dimnjak ugostiteljskog objekta nalazi se na visini sa koje dim i isparenja ne izlaze na dovoljnu visinu kako bi se pravilno raspršili u atmosferu. Stanari su prisiljeni da drže prozore zatvorenima kako bi izbjegli prodor dima u svoje domove. Prema Pravilniku o tehničkim svojstvima za dimnjake u građevinama, dimnjaci moraju biti projektovani i izvedeni tako da ne ugrožavaju higijenu, zdravlje ljudi i okoliš. U ovom slučaju, dimnjak je izveden mimo ovih standarda i predstavlja ozbiljan problem za stanare okolnih zgrada.

Predlažem da Općina poduzme korake u komunikaciji s vlasnikom objekta kako bi se pronašlo adekvatno rješenje u skladu s važećim propisima. Moguća rješenja: postavljanje filtera – ukoliko dimnjak ne može biti nadograđen ili nakačen na već postojeći dimnjak propisane visine zbog tehničkih ograničenja. Potrebno je obavezati vlasnika objekta da ugradi filtere za prečišćavanje dimnih gasova kako bi se smanjila emisija štetnih čestica i mirisa. Alternativna rješenja – Ukoliko filteri ne budu dovoljni, potrebno je razmotriti druge opcije kao što je mogućnost izmještanja objekta na drugu lokaciju gdje bi se mogao priključiti na dimnjak odgovarajuće visin ili prelazak na električnu opremu umjesto pečenja na ugalj.

Molimo da se reaguje na ovaj problem. Stanari očekuju brzo i efikasno rješenje koje će osigurati zdravlje i sigurniju životnu sredinu.

6. POSTAVLJANJE SFERNIH OGLEDALA U ULICI RAMIZA SALČINA

Obraćam se u vezi odgovora na inicijativu koju sam postavila na 3. radnoj sjednici vezanu za postavljanje sfernih ogledala u ulici Ramiza Salčina. U vašem odgovoru pomenuto je da ćete razmotriti mogućnost realizacije ove inicijative u zavisnosti od budžetskih sredstava i stepena prioriteta pristiglih zahtjeva delegiranih od strane mjesnih zajednica.

Želim istaći da je ovaj zahtjev rangiran kao prvi na listi PRIORITETA MZ SARAJ POLJE u rubrici Saobraćajna signalizacija.

Radi se o postavljanju sfernih ogledala NA KRAKOVIMA ULICE Ramiza Salčina:

- U ulici Ramiza Salčina kod broja 27;
- U ulici Ramiza Salčina kod broja 61 (za krak 358 do 370);
- U ulici Branislava Nušića 140;
- U ulici Branislava Nušića kod broja 143

Ova inicijativa nije samo pitanje tehničkog unapređenja saobraćaja, već se radi o sigurnosti građana, što bi svakako trebalo biti prioritet. Obzirom na značaj ove mjere za sigurnost, molim vas da ovaj zahtjev dobije odgovarajući prioritet u daljnjoj realizaciji.

Zahvaljujem na razmatranju ovog zahtjeva i nadam se da će biti poduzeti koraci kako bi se osigurala sigurnost svih građana na ovom dijelu ulice.

7. KOREKCIJA TABELE „REZULTATI JAVNE RASPRAVE O NACRTU BUDŽETA ZA 2025. GODINU“

Obraćam se povodom korekcije u vezi rezultata javnih raspravama u MZ Saraj Polje i MZ Dobrinja A, kojima sam prisustvovala zajedno s drugim vijećnicima.

U slučaju MZ Saraj Polje, nije evidentirano nekoliko prijedloga građana i članova Savjeta MZ, a to su:

- „Uređenje sportskog terena u unutarnjem dvorištu zgrade u ulici Hasana Sućeske 4 i 6“.
- U rubrici za povećanje iznoda za budžetsku stavku „rekonstrukcija i investiciono održavanje infrastrukturnih objekata“ nije evidentirana nužnost fasada– fasada zgrade: Teheranski trg 7, 9 i 11, i krov Teheranski trg 9.
- Pitanje u vezi izgradnje kanalizacione mreže i asfaltiranja kraka ulice Ramiza Salčina od broja 356 do broja 372, dužine oko 80 m. Ovim putem tražim da se građanima dostavi informacija u pisanoj formi o trenutnoj fazi projekta. Napominjem da je ovaj krak ulice jedini neasfaltirani krak i da je već 9 godina na listi prioriteta u okviru „Investicionog održavanja“ (2016, 2017, 2018, 2019, 2020, 2021, 2022, 2023 i 2024. godine).
- Prijedlog za izradu projektne dokumentacije za izgradnju fontane brojem 24/80 uopšte nije bio izrečen tokom javne rasprave.

U slučaju MZ Dobrinja nisu evidentirani problemi koje su građani iznijeli tokom javne rasprave, iako su slični prijedlozi zabilježeni u rubrikama za druge mjesne zajednice. Radi tačnosti, bilo bi dobro dodati stavke koje se odnose na unapređenje kanalizacione i vodovodne mreže u naselju Mahala i Nedžarići, kao i pitanje sanacije asfalta i uklanjanja azbestnih krovova u Aerodromskom naselju.

Molim da se ove dopune uvrste u zapisnik radi tačnosti i usklađenosti s održanom raspravom. Zahvaljujem na razumijevanju i očekujem vaše povratne informacije.

-vijećnica Adis Šahmanija -

1.Podnosim inicijativu da se na autobuskom stajalištu u Naselju heroja Sokolje, kod ambulante postave natkrivene stanice u oba smjera.

Obrazloženje:

Na pomenutoj lokaciji svakodnevno je velika frekvencija starijih osoba iz ambulante kao i školske djece koja dolaze i odlaze autobusom. Ove stanice bi uveliko pomogle da djeca i starije osobe ne kisnu i da koliko toliko budu zaštićeni od vjetrova.

2. Podnosim inicijativu da se postavi ulična rasvjeta u sljedećim ulicama u Zabrdju:

kraka Avde Palića od broja 181

kraka Avde Palića od broja 239

kraka Avde Palića od broja 263

Obrazloženje:

Pomenute ulice trenutno nemaju nikako uličnu rasvjetu.

3. Podnosim inicijativu da se u objekat u SRC "Zlatno Polje" planiraju prostorije za produženi boravak OŠ "Sokolje" u skladu sa upisani brojem djece u školu.

Obrazloženje:

U OŠ "Sokolje" iz godine u godinu imamo sve veći broj upisane školske djece. Kako su zahtjevi roditelja sve veći za ovu uslugu, a sama škola nema kapaciteta da odvoji prostorije za ovu namjenu, molim Vas da u objekat SRC "Zlatno Polje" planirate i prostorije za produženi boravak.

4. Ponavljam inicijativu za postavljanje usporivača brzine ili vibracionih traka u ulici Numan paše Ćuprilića u neposrednoj blizi OS "Sokolje".

Obrazloženje: Zbog velikog broja nesavjesnih vozača i neprilagođene brzine posebno u blizini škole, molim da se u što kraćem vremenskom periodu a u skladu sa vremenskim uslovima, postave usporivači brzine ili vibracione trake kako bi spriječili eventualne nesreće.

- Mirza Memišević -

1. Hitno uspostavljanje sistema održavanja javnih parkinga u naseljima Inicijativa: Pokrećem inicijativu za hitno uspostavljanje sistema redovnog održavanja javnih parking prostora u svim naseljima općine Novi Grad Sarajevo. Brojne lokacije su zapuštene, bez adekvatnog označavanja, čišćenja i redovne kontrole. Uređeni i održavani parking prostori direktno utiču na kvalitet života građana i sigurnost saobraćaja.

2. Omogućavanje korištenja slobodnih termina na sportskim terenima za djecu u stanju socijalne potrebe Inicijativa: Predlažem da se svi slobodni termini na sportskim terenima pod upravom JU "Lokom" omoguće djeci koja žele dodatno trenirati, kao i djeci iz porodica u stanju socijalne potrebe. Time bi se poticalo njihovo uključivanje u sportske aktivnosti, osnaživao osjećaj pripadnosti zajednici i unaprijedila socijalna osjetljivost lokalnih politika.

3. Hitna i neodložna obnova postojećih javnih parking garaža Inicijativa: Pokrećem inicijativu za hitnu i sveobuhvatnu obnovu javnih parking garaža na području općine Novi Grad Sarajevo. Mnoge garaže su u zapuštenom i dotrajalom stanju, što predstavlja sigurnosni i estetski problem. Obnovom i modernizacijom ovih objekata povećala bi se njihova iskoristivost, produžio vijek trajanja i rasteretio pritisak na ulični parking.

4. Uvođenje redovne autobuske linije Sokolje – Stup Inicijativa:

Zbog izraženih potreba stanovnika Naselja Heroja Sokolje i slabih postojećih veza s ostatkom grada, predlažem uspostavljanje redovne autobuske linije Sokolje – Stup. Linija bi trebala imati jasan red vožnje i pouzdanu frekvenciju. Trenutna linija Sokolje – Otoka nije dovoljna, a postoje brojne žalbe građana na neredovno saobraćanje.

5. Osvjetljenje ulice Vahide Maglajlić nakon saobraćajne nesreće Inicijativa: Zbog nedavne saobraćajne nesreće u kojoj je automobil udario dijete, pokrećem inicijativu za postavljanje javne rasvjete u ulici Vahide Maglajlić. Ova ulica je izrazito slabo osvijetljena i predstavlja rizik za pješake, posebno u večernjim satima. Osiguranje adekvatne rasvjete je osnovni uslov za sigurnost svih učesnika u saobraćaju.

6. Obnova spomen-ploče kod spomenika Bana Borića (u blizini Suda BiH) Inicijativa: Predlažem obnovu spomen-ploče koja se nalazi u kompleksu institucija u ulici Kraljice Jelene, između Suda BiH, Tužilaštva i jedinica specijalne policije. Trenutno stanje ploče ne odražava značaj ličnosti kojima je posvećena, niti dostojanstvo prostora u kojem se nalazi.

7. Asfaltiranje ulice Esada Pašalića (od broja 1 do 5) Inicijativa: Iniciram sanaciju i asfaltiranje dijela ulice Esada Pašalića od broja 1 do 5, zbog izrazitih oštećenja kolovoza i otežanog kretanja za vozila i pješake. Ovaj infrastrukturni zahvat bio bi konkretan doprinos sigurnijem i uređenijem životnom prostoru za građane tog dijela naselja.

8. Postavljanje jarbola u haremu Bosanske džamije Inicijativa: Predlažem postavljanje četiri jarbola u haremu Bosanske džamije s ciljem omogućavanja isticanja zastave Bosne i Hercegovine, Općine Novi Grad, Islamske zajednice i drugih značajnih obilježja. Ova inicijativa doprinosi jačanju identitetskog izraza i poštovanju vjerskih i kulturnih simbola unutar zajednice.

-vijećnica Anela Šiljević -

1. Izgradnja višenamjesne sportske dvorane u dvorištu JU OŠ „Džemaludin Čaušević“

Obrazloženje: Izgradnja višenamjenske sportske dvorane u dvorištu O.Š. „Džemaludin Čaušević“ omogućila bi učenicima kvalitetno izvođenje tjelesnog odgoja, razvoj sportskih i socijalnih vještina, te sigurnu i adekvatnu infrastrukturu za aktivnosti bez obzira na vremenske uslove. Osim toga, dvorana bi bila dostupna i lokalnoj zajednici, čime bi postala mjesto rekreacije i okupljanja svih generacija, doprinosivši zdravlju i društvenoj koheziji.

2. Zamjena dosadašnjih rasvjetnih tijela i postavljanje LED rasvjete u ulici Sulejmana Pačariza Hodže dva stuba između brojeva 11 i 15

Obrazloženje: Realizacija ovog projekta donosi dugoročne uštede kroz manju potrošnju električne energije i niže troškove održavanja, uz značajno poboljšanje osvijetljenja i sigurnosti za građane. LED rasvjeta je ekološki prihvatljivija, ima duži vijek trajanja i doprinosi stvaranju ugodnijeg i sigurnijeg ambijenta u ovoj dionici.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a